

四庫全書

子部

欽定四庫全書

子部

翰苑新書續集卷

十六至二十

詳校官中書

臣葉元符

主事

臣

祁韻士覆勘

總校官知縣

臣

楊懋珩

校對官中書

臣

邱桂山

謄錄貢生

臣

王

官

欽定四庫全書

翰苑新書續集卷十六

通判類

賀徽倅葉校書

方秋崖

伏審鳳駕緹屏聿臨練帶新安之山水大要好識行祕  
書別駕之風月平分豈但半刺史聊復爾耳能久此乎  
恭惟獨抱遺經追配古作故能奪多士之氣取象魁三  
蓋嘗登太微之庭去天尺五胡以獲麟之筆而監無懈

之州如聞此來有欲為王留行者雖曰小屈焉能使予  
不遇哉顧紬金匱之藏亟侍玉皇之案某柳橋一別苦  
塊三年素鞵已終曾索長安之米青山無恙竟回剡曲  
之舟自憐黍谷之難春能到草堂之幾日隔曲江之面  
幾若避於燕鴻寄盛山之詩尚相忘於鷗鷺

賀處州詹通判

陳寅

十行楓陛半刺括山當聖君重外之時誰屬佩刀之贈  
屈賢者治中之任行觀岸幘之吟和氣先春驩謠不夜

某官氣涵鈞瀨學派象山鼻祖當年成績具藏於勲府  
耳孫此日正傳不號於名家人方炫鬻以致身我獨盤  
旋而卻步兩顙劇縣惠利川流一佐名城聲華風動僉  
期大用合有衷言屬逢黃霸之作州又枉孔恂於監郡  
馨香二妙覆罩一同甫傳授御之環臨已覺旄倪之鼎  
沸上方籲俊公合舒翹雖邇遐不係於戚休然出入頗  
關於輕重題輿閑暇固共知逸思之長推轂紛綸行即  
聽褒音之渥某家無長物室有餘書甚思菽水之怡愉

無奈木風之蕭瑟少馬豪勇眼邊僅脫於千愁中也情  
慵意外方叨於一第末哉行李壞若負芒蓋平時未慣  
於討論則今日孰為之憑藉憂勞百日幸會二天精神  
未泯於春陽肝膽已披於夜月非四海習鑿齒豈能引  
領於古風遇百里龐士元或可伸眉於此日脫免於戾  
敢昧所歸

上贛州周府判

戴象麓

伏以地控二川喜際名流之分月官卑一尉幸階屬吏

之趨風方圖伸斂板之恭烏敢緩贄函之禮編摩尺墨  
披瀝寸丹恭惟某官嵩嶽佑賢雲川毓秀捕龍蛇搏虎  
豹瓌語驚人騎麒麟翳鳳凰清標照物塞帷桂苑濶步  
華涂錦刀奏最於男邦泥軾馳聲於侯國當促侍九重  
之禁胡復煩半刺之才蓋海沂資康乂之功而岳牧藉  
保釐之助江山借重章貢之桴鼓不鳴風月供吟鬱孤  
之臺榭並煥福被千里謠興十同雖邦人願少借於王  
祥然天子已深思於賈誼跨九萬里扶搖之運佇快鵬

圖駕四千石別乘之車詎淹驥足某醯雞小見芻狗棄  
材家貧而笑餽粥之無由技拙而藉詩書以為業云云

通邵武黃府判

方烏山

雅望監州羨公有蟬謗材入泮愧我無羶行託迹於屏  
簞亟登名於朝櫝恭惟某官江夏無雙之家世山谷第  
一之詞章早仕昭明文選之邦窺千里之老筆行徧子  
美吟號之地富一部之全詩迨蓮泛近乎日邊盍筍班  
歸於天上諸公貴人之薦視若浼焉別駕長史之官取



何廉也維茲樵水介在閩江郡斗大雖不足回旋俗升  
平亦差堪行樂想平章於風月聊管領於溪山展驥治  
中緹軾之權增重列鸞廣內紫囊之鉢安歸某拙而無  
竒弱不自植子雲少作空令衆口之傳浩然長吟多有  
轉困其志慮薪米裘葛愁其心腸看花之樂轉希采  
芹之行良謬何以慰諸生之望幸而事通守之賢夜雨  
簷花敢作鄭老冷官之歎石泉松雪倘陪白公佳境之  
游依嚮方深揆裁靡竟

通臨安顏府判

王臞軒

楊柳江頭早跂雲霄之華閱芙蓉幕下晚依風月之清  
光公如喜見於鄉人僕敢自附於邑子裁書寄雁指日  
登龍恭惟某官峻揭斗標清凌氷柱有祖餘烈宛然棠  
笏之猶新讀父一經應是籛金之不羨早已結水蒼而  
綴朝列必欲書淡墨而續世科衆作蟬鳴威鳳乃儀於  
玉籥文場蝸餌巨鱗肯上於銀鈎主司避出於一頭神  
人為搖其隆鼻直上宜薇階之侍斜飛亦蓬島之遊尚

於京輦以監州見謂名流之借徑屏星漫爾不妨題別  
駕之輿台斗燦然重見曳尚書之履發揮遠業振起家  
聲伏念某地寒無媒天賦不腆萬言一杯水少而空費  
於精神十步九太行壯也纔收於科第偶圓得鹿之夢  
免讀相牛之經平生耿耿者猶存與時落落乎難合初  
筮經行於湘水聊爾棲身至今悵望於衡雲不堪回首  
京幕戍期之已迫書生宦譜之未開賴有偉人曲從鄉  
誼箴規之以藥其失提挈之以玉于成任大國從英俊

之遊此心則喜事長官如父兄之側惟命之恭

通潭州吳通判

李梅亭

歌海沂之別駕無路事賢詠臨邑之卑棲涓辰效役敢以尺書之敬徹於再拜之先恭惟某官地望穹華人門峻特冠切雲帶長缺夙超四姓之侯佩明月懷連城要是萬人之敵舒翹綠水展足赤城盍歸乎來何去之速峻溫洛滎河之直分清風明月之平邦國不空足表監州之績公侯必復益先著令之忠卧而治之行且召矣

某崎嶇白戰漫浪朱勾不卑小官寧免塵埃之筆楚當  
詣大府尚希風雨之旃幪

通建寧葉西判倅

劉後村

守相之官謂之按察子男之國責以拊摩隄瞻半刺之  
尊曷贄一箋之敬某官文配古作經為人師世無仲尼  
不在弟子之列後有揚子必好太玄之書凡平生學問  
之所通多徃昔儒先之未發素行孚而士論定新義出  
而紙價高晚自江湖來遊學省羣仙指點宜順風進蓬

萊之舟丞相挽留乃拂袖去平津之閣繫以千駟而不  
顧挽之萬牛而莫迴暫管領於溪山且平章於風月然  
而別駕長史恐有待於賢才國子先生烏可浼以吏事  
佇膺號召入近禁嚴伏念某見擯儒家嘗謀邊事短衣  
射虎不願萬戶侯之封精舍讀書寬作二十年之計因  
高堂之有母求小邑以謀身近采傳聞始知敗壞未嘗  
讀律既非几案之才素不言錢安得錐刀之智自量之  
審何恃而前豈無矯強自勉之心深慮罷軟不勝之譴

雖世無冷鑊咸嗟作縣之難倘府有急符尚賴監州之庇

通福州鄭府判

守仁

劉後村

通家累世素欽月旦之評作吏一行密竊星屏之庇非  
有善事上官之智寧無喜見似人之心問戍云初登名  
惟謹某官清規濟世峻閥摩宮學問源流龍首親傳於  
衣鉢風流醞籍鴻樞近襲於箕裘白衣綵以遊殊廷迨  
縱軔而登榮路婉婉贊外臺之畫翩翩題別駕之輿豈

逝矣海沂驥展復須於詳試意歸然閩部鯉趨嘗記於  
舊遊民方深鄭子產之思公真是房太尉之子又況昔  
司族邸今贊宗藩流風善政未久猶存多士國人皆有  
矜式問訊西湖之柳色栽培南國之棠陰惟先世有旂  
裳之勲而執事真臺閣之彥豈容緹軾久勞州縣之間  
會取青氈重復公侯之始某學焉不力仕也以忠陟岵  
恩深悟往日軒裳之夢循陔養切嗟暮年菽水之貧將  
謀就於斗升非自營於尺寸然尉在百僚之底顧身無



一技之長假假造前凜凜淑後幸通守有粉榆之契庶  
下僚寬筮楚之憂雖貌是互鄉之童無與進者然生於  
通德之里終有賴焉或免於愆弗忘乎報

通汀州陳府判

方壺山

半刺入閩漸近父母之國孤生試邑謬稱子男之邦僭  
徹司涓行趨前軾某官筆秉金管印傳玉堂學相承於  
博宏屢嘗鏖戰文不下於伯季姑遜先登最有可觀屹  
然自立筦庫亦足以隱庭除或聞其哦鳬舄翩然鵷行

必矣京秩既七計考平亦監州光範不一呈身特為變  
法坐嘯淮漕之幕徐題鄴丘之輿考之史書從唐裴胄  
而後近而壁記僅郭功父之名

元祐中郭祥正

孰大此官宜增

顯士望雲樓上多吟風月之篇拜相

崗前拜相山去三里識云俾子

崗前拜相山

請實山川之識某南來公族西外寒生一官為

親所恨養親之短三仕佐長豈堪為長於斯望淺自疑  
傳望殊異柄之去邑久矣民之眎令蔑如是固在人誰  
實為地棲伏三山之日久講聞貳乘之誼高竊計似人

必念粉榆之舊俾少行志相安篁竹之氓依歸更深伏  
謁乃請

通何通判

王臞軒

槐庭相種平分霽月於軟紅蓮幕陳人行挹清冰於瑤  
碧裁書寄雁指日登龍恭惟某官千英萬俊之才名累  
相重侯之閥閱束以簪裳而不任力於翰墨以策勲衆  
作蟬鳴威鳳乃儀於玉鑰文場蝸餌巨鱗肯上於銀鈎  
主司避出於一頭神人為掩其隆鼻盍即布雲霄之武

乃肯浣州縣之塵笑談鳴偃室之絃霜凝牛心慷慨辨  
太原之檄雪滿貂裘人皆憊通於要津公獨夷猶而緩  
步星屏一駕日筍增輝題別駕之輿即蜚聲於紫禁寶  
甘棠之笏行出色於青氈伏念某地寒無媒天賦不腆  
偶圓得鹿之夢獲脫相牛之經平生耿耿者猶存與時  
落落乎難合初筮經行於湘水聊爾棲身至今悵望於  
衡雲不堪回首京幕戍期之已迫書生宦譜之未閑賴  
昭代之偉人必垂情於同類箴規之以藥其失提挈之

以玉於成仕大國從英俊之遊此心則喜事長官如父  
兄之側惟命之恭

通陳通判

王耀軒

半刺位穹素負題輿之望廣文官冷曾無繫馬之階僕  
因邑子以通名公見鄉人而必喜恭惟某官喬木叅天  
之閭閱靈芝瑞世之才名文惠家慶圖乃士夫之共慕  
夷簡宰相器為伯父之見期萃師友於家庭對聖賢於  
方策學之優乃出而仕人之美有甚於門凡所設施孰

不奇偉有劇縣譜江淮之草木知名真上幕賓閩粵之  
山川入句薦書載路夙駕入京相君握手以願留執事  
掉頭而不顧爰眷刺桐之郡舊為恭梓之鄉佩印監州  
容與星屏之樂過家上冢輝煌畫錦之榮壺公改色以  
驩迎海沂興謠而載美以長才而展驥足以厚德而鎮  
麟宗報政未及於期年奏最已優於一道行吟紫帽見  
稱別駕之風流入覲丹墀佇接文昌之步武有如某者  
見謂斐然對策廣廷徒有空臆盡言之直校文列陞乃

罹疾聲大呼之讒漫尋宗邱之文盟姑便家山之問信  
竭來倚席寒甚無氈幸先世之夤緣託年家之契好必  
蒙刮目毋有遐心祇恐衮衮臺閣之登不容攀附所謂  
渠渠夏屋之庇正賴帡幪

通韓府判

林克齋

名藩半刺夙懷仰德之誠賓幕具員預有依仁之幸雖  
鷗鵬之分異然草木之味同輒以寸誠寓於尺牘某官  
宗城挺秀雋域蜚英早奮身涂九萬里風斯在下亟騰

最績十二牛功若發硎固嘗被交上公車之章胡乃屈  
治中別駕之任睠言巨鎮實控上流綱條全藉於贊裨  
談笑可空於盤錯齊山秋浦不妨風月平分漢席夜釐  
行即雲霄直上某受才甚下賦分多奇頃迄役於計臺  
嘗汚名於書府屬當逃谷詎意起家十載皇皇進寸退  
尺長江浩浩自西徂東造之姑詠於盎糧敢云騁下白  
也願陪於尊酒時與論文

回諸郡通判

方烏山



逆鱗罪大分一壑之歸耕駕牡命優奉六條而同俗愧  
乏單車之風采乃煩別駕之情文得之悚然匪以報也  
恭惟某官才猷粹美器韻宏深管領溪山付政事於游  
戲吟哦風月特翰墨之緒餘暫監無蟹之州有華展驥  
之望姑令平進萬戶侯何足道哉若曰斜飛三千里斯  
在下矣願宏遠識式究雄圖某觸熱亟行觀風何取傳  
檄雖笑相如之陋埋輪亦無孟博之豪使臣禮樂有光  
豈敢憚馳驅之力長史議論為職倘聞相規益之言三

復深藏七襄莫報

回興化軍江通判

方烏山

乘輅誤渙僕未免於鄉人銜袖鳴謙君所見者今我不敏於謝蓋訥於言恭惟某官胄緒岩崑才猷微妙游戲政事非俗吏所能為嬉笑文章皆風人之託物姑少淹於驥足終須上於龍頭為憐流落之餘驟有光華之寵當行道遲遲之際動故人戀戀之情第某不能深藏大是浪出過里門而屈方師石慶之謙恭埋亭驛之輪那

復范滂之慷慨

回輿化軍趙通判

方烏山

伏審縮次葵丘平分莆壘親賢望重合班廣內之羣鵷  
宦達趣廉又作治中之別駕先施寵甚後賀慙然恭惟  
某官龍種殊常鳳毛濟美鍾筮澤山川之秀望之蔚然  
挹鑑湖冰雪之香冽其清矣憶監州於鰲水藹奏最於  
屏星行矣十州依然半刺仕固係於工拙理亦有於乘  
除八面湖山少借平章之手九街禁路便為清切之官

某分竊滕廬偶居漢部攬轡倦矣況用之鄉人焉題輿  
勉旃敢告於執事者薄言問訊不究揆裁

回台州章通判

巽亭

鄭雪巖

伏以挹冰壺於姑蘇暑消六月駕星屏於仙陸祥應三  
台邂逅適我願兮離合非偶然也門方羅雀書乃寄鴻  
公定不凡人應駭見恭惟某官風規楚楚天宇融融扁  
舟往來飽挹湖山之清絕環轍遊宦熟諳閭里之艱難  
於今正當攘外出車之時斯人可淹治中別駕之選仕

不擇地志欲濟時滄海赤城豈在棲月標霞之樂海雲  
山澗正望作雨潤物之功何幸受廬亦霑餘澤某幸脫  
重負倦還舊巢無事不到城闉有恃可安田里丈夫之  
展驥足豈久此乎漁父之尋鷗盟良可託也倚觀報政  
相踵馳緘

回于通判

待用先得新倅  
改貳安慶寄治

鄭雪岩

谷口煙霞我方輕去邊頭風月君欲平分忽焉相會異  
鄉恍然如同里喜可知矣報何如其恭惟某官吾社

奇男高門秀種少從令公征伐早著駿聲胡為士元聲  
名尚遲驥足曠懷絕俗有句驚人自謂投筆取萬戶侯  
居然題輿遊一沙渚舍魚而取熊掌相去幾何維鳩而  
居鵲巢其來已久塵生虛席雨暗重茅曠聞泥軼驅馳  
安有星屏氣象人所棄者公乃惠然得非天誘其衷密  
假風寒之助只虞借逕即便趣裝某作別五年阻脩盡  
紙頻聞傳命謂鳳凰之斜飛堪笑分符若鷗鷺之有約望  
霓甘澍滌暑清風何礙賦詩望眼江山之外正須共話

折衝樽俎之間淨掃齋廬肅迎車旂

回米通判

方秋崖

我有此客亟剡公車國自得人何煩私謝但喜皆山之  
妙聿來別乘之賢恭惟某官寶晉聞孫薌林宅相矍鑠  
哉是翁也覺氣格之老蒼富貴者驕人乎獨宦情之寂  
歷秋水芙蓉之共泛歲寒松柏之後凋既頻攝於軍符  
盍逕紆於郡綬是區區者不予畀何以假為吾遑遑乎  
欲何之敬聞命矣孰為軒輊更辱緘滕某自返屠羊已

傳展驥故人書斷絕但仰廬山之高半刺已翱翔亦笑  
醉亭之舊

回高通判

方秋崖

父老何自為郎起而予郡天子使來監汝偉甚題輿曾  
分風月之平共倚江山之重恭惟某官三蘇公之翁季  
四蜀郡之精英航灩澦而東南本朝無出右者旁觚稜  
而上下別駕寧可再乎豈不以吾民之袴襦政欲為此  
邦之襟帶春臺樂只秋觀遙哉不俟駕行亦頗哀老子



否徑排闥入得毋呵醉尉耶蓋以某生而草茅老於荆  
棘耕寬間釣寂寞吾亦自安其天履巉巖披蒙茸道之  
不行也命豈意白雲之深處有來黃紙之除書辭不獲  
而敢前誰則恃而不恐有監州而無蟹何樂於予得尺  
素而烹魚以喜為懼未盡山林之習氣尚惟襟度之包  
荒

回添差李通判

方秋崖

伏以昌黎所刺州冒然至只贊皇此佐郡若將浼焉樂

莫樂同寅之依可不可長庚之即有來儼王無與報瓊  
恭惟某官仙李其根崇蘭斯馥是父是子忠孝萃於一  
家乃武乃文經綸兼乎數器居幄帷而運籌策安邊境  
以立功名振振鷺翰盤盤驥足甫詠山頭之白紵又尋  
水上之紅雲意廼翁宅南土以董師而當宁起西平之  
有子俾往而侍以佐于蕃綵皇皇兮萊子之衣綬若若  
乎烏公之幙國寬憂顧皇曰來歸魏公入宣公除曼光  
近比周拜前魯拜後丕軼前聞某生地燥剛稟天狷直

敢南陽帝親之問有真是非耦西疇野老而耕無它望  
想淒其七稔偶此一麾箋枕莫遂於祈閒趣戍存叨於  
申命山水其郡分風月而三之江湖此天為雨露則一  
耳所希緘迪以愜襟期膺門合作龍夢懷方元英之句崑  
丘覩鳴鳳神交李太白之仙縣旌自搖淨繭難寫

回漳倅王武博

時守泉州

真西山

分菟符於舊服自懼陳人展驥足於鄰封時惟名士所  
遭幸矣何喜如之伏惟某官淮海餘芳河汾正派文章

出已機軸膠轕星辰人物如古壁主輝華郊廟越絲右  
學出貳左符蓋幼學壯行之心期於澤物故難進易退  
之節卓爾過人竚上印於龍江即演綸於鳳閣某婆娑  
故步警惕後圖枵然空乏之餘叢此衆多之望天枝增  
衍每虞廩餼之不時禁旅分屯動憂船粟之弗繼懼莫  
稱藩符之寄仍幸依鄰燭之輝毋效秦人坐視越人之  
瘠願同晉國獲分秦國之波

代施倅

稿

回邵州王倅

祖堯

李梅亭

裏緹命駕引綬露章湖南二郡之豪雄今稱第一江右  
諸王之竒俊願屈平分下車之初載路相慶恭惟某官  
典刑炳蔚才諧浚明梗楠大夏之材久於聳壑瑚璉清  
廟之器何乃潤山滿期留中還又補外厥為濱水尚存  
漁父之滄浪匪直海沂可養公台之度量飛騰由此翹  
企竢之某再轉無庸同寅有幸託交承於隔政不但為  
瀟湘之故人話契濶於期年渾未隔京華之舊夢問兩  
鴻鵠諒歸詔之鼎來遺雙鯉魚覺報章之不腆

翰苑新書續集卷十六

欽定四庫全書

翰苑新書續集卷十七

諸幹官類

通廣西蕭機宜

劉後村

瞻蕭傅之門素欽前輩佐烏公之府獲事元僚屬當  
問戍之年敢廢登名之禮恭惟某官天才高邁世德  
深長稟大參剛介之姿得文昌渾厚之氣吐詞奕奕允  
魚燕許之能落筆駸駸不減鍾王之妙煜然華問際此

明時盍侍紅雲一朵之邊乃客梅花萬里之外然而山川清淑幕府尊嚴典刑足以領袖諸賢嘖笑足以慘舒一道乃如公子素馳魏闕之心將有神仙共引蓬萊之路徑登禁索襲取家氈某跡比蓬飄命過紙薄枕戈塞上竟無獲級之功負耒田間已作終身之計不圖帥壺使奉辟書以平生懷見賢之心於此日有事長之幸吾從先進方願學於步趨子所雅言尚曲垂於警誨

通福建余運管

劉後村



光奉贊書來參計幕陪輜軒而問俗咸仰元僚執蒲穀  
以臨民叨居屬部敢贅千麾之敬冒塵督察之威某官  
氣稟清英品流高勝勲名事業紹熙丞相之家孫文獻  
典刑嘉定從臣之猶子粵自麒麟之墮地共期鵬鶚之  
在天而乃於簡編燈火以究心視鐘鼎旂裳而若浼兩  
臺贊畫俱為名公之所知百里承流殆以寒士而自處  
已書邑最尚詭民庸蓋全閩煮摘之利饒而大漕澄清  
之權重有如上介必揀時髦方將持大體於言議風旨

之間何至親細務於米鹽錢穀之末側聞公子素馳魏  
闕之心將有神仙共引蓬萊之路某早孤鮮援漫仕不  
諧偶脫選坑冒當劇邑終年勤苦無赫赫之可書一念  
撫摩有蒼蒼之在上然命脈實關於漦運而主盟全藉  
於帷籌忻聞名輩之臨倘篤通家之好雖無善政敢希  
堂上之絃儻有危機尚賴幕中之辯

通吳運幹

方壺山

肺腑懿親雅稱上臺之佐本支疎屬敢辭下邑之卑聞

名久之脩贄禮也某官富甚天分產於后家嗜好清脩  
一癯儒而自牧封閉驕吝羣公子之所難屢嘗塵鞅之  
親茲就禮羅之致興言七聚亦餉三邊轉輸不至於乏  
興根本宜加於密護入幕能辯有石處士之風居朝推  
賢維烏小君之美某半生自力三任靡成一領荷衫憂  
乎身計數間茅屋強以縣名民瘠可憐政苛奚忍幸趨  
節下得輸覆護之情將墮山間竭盡推摩之力所為飯  
向不盡編摩

通廖提幹

陳寅忠

棲足雷封恐不慣勾稽之冗舉頭星幕尚能陪談笑之  
餘雖疆圻未半於九州想光采亦分於百里輒因行役  
敬布悃忱某官忠藎傳家恢奇範俗祥麟一角經赤水  
以蜚英威鳳九苞向丹山而吐秀妙年發聞盛旦舒翹  
哦松之韻何如泛蓮之名籍甚盍躋紫橐屈佐皇華有  
嘉分幙之榮迥邁同堂之樂佐鑄金之冶已多鍛鍊之  
精問造物之爐必有陶鎔之妙竚聞推轂躡蹠登畿某

末第強顏卑官失志從昔簡編之上頗殫厥心於今簞  
楚之間敢負所學平側千巖之竇淒涼一水之濱雖云  
甚窮亦曰多幸眼邊朱墨固難蹤跡於崇臺舌裏玄黃  
尚足拄撐於矮屋

回史機宜

李梅亭

識嵇父於未仙如敬人中之鶴見徐卿之有子真成地  
上之麟辱貽秋月之兩章尤服春雲之多態恭惟某官  
材為國瑞學有家傳手敏八叉亦欲吹噓而送上眼迷

五色竟難摸索於暗中不妨利吾器以俟時行即溉其  
根而食實斯文如女有正色安用自憐我相夫子非癯  
仙即騰善價某方謀下榻聞偶稅郊茲勤連璧之臨咸  
有明珠之贈寸田耕不盡益信任忠敏之詩二季對相  
望誑有歐陽子之識

回王計議

方秋崖

伏審峻陪相議增重藩符彼敵何能為當不負圯上之  
學今計將安出其必吐胸中之奇願聞一言聿寧四履

蓋韓愈政慙幕辯賴留侯肯辱帷籌中有尺素書敬  
佩烹鯉魚之贈報之青玉案尚賡洗兵馬之詩侯其勉  
之行胥告矣

回舒計議

方秋崖

歸去來兮乃司故府聊復爾耳又贊戎垣鳩如燕壘之  
尋喜甚鷗盟之在恭惟某官儒而韜畧語亦詩騷左手  
取印右手執干戈夙負兒時之志上馬殺賊下馬草露  
布適羞我輩之顏久畫諾於油幢每檜清於氍帳楚氛

甚惡莫先摩壘之憂漢軍皆驚可後登壇之拜某愴聞  
邊羽俟聽帷籌今我來思自笑衫青之依舊侯誰在矣  
未應頭白之如新願無遐心相與近慮

回張制機

方秋崖

公車飛剡帥閫借籌人物渺然竊歎四郊之多壘時事  
如此孰為萬里之長城茲得一賢重增九鼎恭惟某官  
以燕公大手之筆傳穀城老父之書儒者乃知兵乎用  
能決千里之勝丈夫當為真耳豈惟記三籩之亡試嘗



慨披輿地之圖固已熟攷華夷之勢彼烏乎強吾烏乎  
弱戰何為勝守何為堅了然胸中殆猶燭照而龜卜運  
諸掌上寧慮秋高而馬肥有偉弓旌之招式僕甲兵之  
洗政恐青油譚笑雖賀得賢主人然有紫禁煙花詎久  
稽天下士某逝言已去于思復來前度劉郎絕歎桃花  
之老我秋風張翰終懷蓴菜之可人又將賦歸去來兮  
之辭亦姑作居無幾何之計功名付公等相期久遠之  
看煙水有吾廬倘遂寬閒之適願言載色共話此心

回朱制幹

方秋崖

思鱸解去奈何主金耀之書騎鶴復來奚以贊玉垣之  
畫獨喜尉僚之君子率皆冀部之故人夙已會心歎其  
晤語恭惟某官辯足以折五鹿忠足以集千鳥幕府翺  
翔信有瓊花之詩債邊城騷屑小迂玉笋之仙班誰言  
官閣之梅幾老山莊之橘賴吾此客增重元戎小卻盛  
之白玉堂聞且召矣古云樂者青油幕寧久居乎某囊  
拳芙蓉味同草木許身何愚而自比稷契恐貽笑大方

之家同官盡後而偏善柳劉不妨回俗士之駕豈其久  
要而我遐遺

回艾制幹

鄭雪巖

伏以國事以同寅最重脈絡相關古語謂先施為難氣  
義可上胡然蒙此何以致斯某官毫端無塵塵尾飛屑  
老於學問富貴曾何足言志在功名器識是誠遠到世  
道寢下人才良難湓浦初羅老子之興不薄鍾山再會  
元戎之約愈堅絜矩必同造車默合此是飛騰之路決

於遇合之機某歸興甚濃俞音尚閤念虎騏之共二愧  
熊魚之得兼圖終方艱有恃無恐雖未識面已同吾夫  
子之門諒必知心肯為李將軍之地不敏之愧有言莫  
酬

回耿制屬

李梅亭

重客及隍缺於遠肅高文銜袖厚甚先施恭惟某官山  
立清標淵回懿學暫試三語之掾迄無一夫之寃茲被  
制捆之知俯按荒城之陋某諧再覲仍拜屬辭徒深巾

衍之藏莫效檐榆之報

回任制參

方秋崖

伏以四郊多壘辱在吾曹萬里長城莫如賢士今得識  
時之俊傑庶幾濟世之艱難伏惟某官早游羣公之間  
無與諸任而齒千年鶴帳飽諳世故之濤瀾半夜雞聲  
愁絕邊頭之風雨未覺據鞍之老寧忘橫槊之奇雖飯  
一盂蔬一盤何求於世然車幾兩馬幾匹共嘆其賢用  
以禮羅望于籌幄某拜命之辱陳義甚高無外敬正士

而甘受佞人則聞之矣彼善事上官而無失名譽竊亦鄙之敢無脩容式遄胥訓

回許總幹

月卿

鄭雪巖

傾蓋相逢聳聽禮樂縱橫之對袖珍再訪又聆珠玉駢儷之奇見余亦多如公者少恭惟某官胸襟磊磊意氣飄飄補河東三箠之亡口能成誦效終軍長襦之棄身不辭難宜運堂上之籌尚草邊頭之檄聞雞起舞非將軍油幕之能淹上馬賦詩有元帥鉞壇之素識肯投禍

刺不鄙吳門顧如所求亦何敢斬所幸投機於兔過之  
後莫能備數於鶚薦之初不可挽留又徒惜別尚絅服  
子思之訓願效一言垂索復劉龔之書愧無多贈

回杜帥幹

方秋崖

迂荊州牧不虞兩易之喻入鄭公鄉何幸二難之識聿  
來鯉對素知鳳毛恭惟詩賦樊川衣冠杜曲繫昔元帥  
大寬北顧之憂誰其內謀見謂西平之子已報氊裘之  
遁去夫何衰絰之斬然能事親則能事君難移此孝可

奪帥不可奪志是謂之忠禮制以終恩言有偉某不能  
忌器又復移家以玉淵易碧玉之環未知孰勝使朱紱  
共丹朱其轂老我何堪

回劉撫幹

李梅亭

先庚有命焉知賢才而舉之高甲為郎何見公等之晚  
也冒然剡入無以謝為恭惟某官學超人羣辭窺天巧  
一第直溷子政有貴於晚成屢薦不入官亦何憊於同隊  
假以歲月矯焉雲霄某得於所聞言之不忤燭之武老



矣無能為矣一力告休仲山甫舉之愛莫助之萬祈雪  
白

回吳運幹

鄭雪巖

初發京聞照剗中為范昭文取去却  
為作昭文書轉求西淮謝憲削合穎

楚人亡弓楚人得弓弓猶在也秦王求璧秦王還璧璧  
何損乎結浮屠千尺之共皆大釣一轉之力莫非定分  
誰敢矜功伏惟某官天分甚高旦評早著明月之珠夜  
光之璧其價素高台階之槐朝陽之桐厥產也異歐陽

公在朝江右無遺士叔孫通制禮魯國召諸生子不自  
言予何敢隱甫徹泰階之聽遽回陽谷之春失若驚得  
若驚若有神相出乎爾反乎爾是豈人謀某自揆何人  
能致此客近捨皇甫本亦何心不舉仲淹烏能無愧茲  
聞橘枳之異地敢言桃李之吾門何以謝為但多助喜  
有來儼語曷當二生之虛稱尚待合辭庶幾三益之我  
有其交也道不假於言

回洪運管

方烏山

埋輪無力自嘆吾衰涉筆得賢差強人意有來華問仰  
感盛心敬惟某官衣鉢文章箕裘軒冕風儀如許雅宜  
綴玉筍於班頭榮進湛然顧乃褰芙蓉於木末積而不  
發用也必宏維計垣闕閩都之大綱而元寮號幕府之  
高選吾乃有此客豈不足歟公要為何官會且升矣少  
贊木牛之運即榮金馬之遊某久矣閉闕忽焉乘傳攬  
轡而筋骸散褰帷而耳目疎全賴時賢共襄老子吾何  
適莫俱為座上之賓事有是非毋惜幕中之辯

回吳發幹

鄭雪巖

聞而知見而知自古難齊所好朝舉一暮舉一于今並  
拔其尤喜得雙鵬盡空凡馬嗟乎人心之有異尚病於  
天下之無全材夷之清惠之和未許之任由也果求也  
藝罕進於仁非聖賢責人以難乃春秋求賢者備其純  
如玉有好斷金必有異焉豈苟同者某官龍川之門酷  
似東萊之鄉好脩久矣文晏之深知肯舉他人而近捨  
況乎蘇曾之臭味適獲我心之所求不約而同何勤於

謝豈但蘧伯玉無獨善之恥要亦臧文仲免竊位之譏  
嘗對人言徒借君重魚熊皆我所欲也何幸得鯁蛟龍  
豈池中物乎行看致遠從三所與有萬可覘

回朱提幹

方鳥山

我行周道曩記時賢君入鄰臺謁稱佳客有來華問仰  
感盛心恭惟某官六館英游九州望士解褐袍而徑出  
觀者堵牆設絳帳以宏開儼然重席便合吟哦於紅藥  
却來採摘於雲芽所謂伊人有能留於此土不有君子

孰為重於本朝靡待鶚飛式觀鵬運某久於耕釣忽爾軒  
輶嘆衣錦之何榮欲埋輪而無力秦肥而視越瘠子亦  
何心晉用而皆楚材吾將有請勿勿野次草草櫝儀

回本司趙提幹

與磁

鄭雪巖

偶兼攝周使臣之轡於我難勝不待設烏大夫之羅得  
公為重何憂共二已遇益三某官知達圓機才優鞭算  
周詢民瘼正望舉爾所知灼見利源要在熟之而已幕  
中既有此客席上可張吾軍只恐五鶚齊飛難留子駕

尤喜雙魚先遺寶獲吾心非人能為亦天借助某未能  
寡過所賴輔仁幸同寅恭必有規警自今每事必訪有  
好斷金如能遺覆得中何啻獲璧姑此占復莫既欲言

回浙西潘提幹

助

鄭雪岩

棣華楚楚已識二難車轍皇皇再逢三益自天借助易  
地相逢凡我同盟皆吾臭味某官一點浩氣五色瑞躔  
禮樂縱橫由紹興而後未有此對議論剴切自寶慶以  
來皆所難言直者必伸偏其自反肯來贊畫相觀而善

必多夫豈駕虛先行其言可信吾將往矣君無棄焉某  
拙固無竒愚非自用多聞闕疑多見闕殆以友輔仁周  
爰咨諏周爰咨詢虛心求隱儻得一賢之謬謬已勝多  
士之容容有好斷金何啻獲璧只恐趣九霄之步不可  
延留尚或為數月之淹庶蒙善告率爾裁報諒乎相孚

回常平吳提幹

鄭雪岩

伏以價鄧名門久騰芳於椒畹造洪上幕早通籍於金  
閨何能增高所欲推美敬以某官家有文獻世篤忠純



恥為金張許史之流典刑不墜雅好游夏由求之問政  
學俱優甚慚隨衆游揚無足為君軒輊固將連茹自知  
有忝於拔茅第欲添花未識可裨於製錦其為贊詠罔  
既敷宣

回張節幹

鄭雪岩

丈夫有四方之志夫豈好遊吾子遠千里而來何必曰  
利必將教我何以謝君伏惟某官筆下瀾翻胸中泉湧  
未應投筆捷步登壇當自明經唾手拾芥敬覽四六之

高作諒匪尋常之淺才我朝設科公卿皆自此出先儒  
立教英俊豈肯他求貂蟬夫豈盡出兜鍪毛錐未必不  
勝刀劒與其臨淵而羨也孰若待賈而沽諸如某既不  
足依初無可數殺賊奴佩金印非我頭顱草麻制登玉  
堂無此骨相抗塵可鄙引類未能空谷聞聲他鄉識面  
喜可知也報將何其汙瀆辱蛟龍恐成枉訪高崗鳴鸞  
鳳夫豈久淹歸而求之有餘裕矣

代回新成都趙帳幹

並

李梅亭

計幕借材鼎來主畫郵簡聞報方欲貢書猥勤下問之  
先殊感高情之厚恭惟某官世濟其美父教之忠材力  
有餘解全牛而不頓智囊無底洗凡馬而可空是宜即  
復於青氈不謂尚淹於墨綬惟茲漕輶正重賓筵惠然  
肯來協贊皇皇之轡出其所學行豐暴暴之材不俟章  
交會應召用某冒焉行險甫此依仁及同君子之察亶  
為幸會所媿小夫之牘不盡傾期

與陳運幹

劉後村

外臺參畫早策足於高華支郡詰囚方失身於冗賤久  
願執鞭於平日何期拔劍於下風仰瀆崇深俯陳短淺  
某官受材卓爾詣理泓然發聖經賢傳之微首為儒唱  
兼墨客騷人之體早以文名惟今日之東嘉比盛時之  
西洛有如巨擘合覲清光乃掌檄於侯藩復泛蓮於京  
國士猶聚蟻方擾擾以慕藟公若高鴻獨冥冥而避弋  
方聖朝之固圉贊膚使以建臺何至役精神於簿書要  
當歷紛難於樽俎細旃廣廈政未橫金華之經古木畫

牆亦合給玉堂之札斯文有望夫子何心其涉世至迂  
承家不競菜羹陋巷粗安貧者之常丹竈草堂雅有終  
焉之志因出營於親金偶來踏於京塵既謀鄰境以需  
瓜甘學老人之種橘云何銷印莫追失馬之還及此拏  
舟幾有葬魚之阨親友贊休休之策上官移急急之符  
顧未暇於招魂又豈諳於析律尚喜出庇臨之下庶親  
承教詔之餘雖無堂下之言可裨采擇設有幕中之辯  
竊冀優容

與李檢法

劉後村

某官清姿山立傑作金聲胸次包涵馳騁上通乎千載  
筆端隳括機杼自成於一家既不卑棲枳之官復去作  
依蓮之客久合並飛於東馬云何尚伍於鄒枚上方右  
丈公豈左宦頃側聞於廟論頗屬意於邊防謂虞廷司  
士之官刑已懲於猾夏而魯人長勺之戰獄尤貴於察  
情少屈儒英往參臬事非止藉賓僚之嘯諾蓋將助膚  
使之平反法三尺安出哉為旁參於古義活千人有封

者行且驗於陰功

首末與陳  
運幹啟同

翰苑新書續集卷十七



欽定四庫全書

翰苑新書續集卷十八

職曹官類

賀林僉判

孫養晦

占斗牛而辨次最重潛藩肅車馬以遵途來參婉畫敢  
因風而贊善將指日以蒙成某官學本家傳美由世濟  
翠竹碧梧之韻流風具存紅蓮綠水之游清名夙著又  
屈臨於督府將偕重於賓筵懲抱積之欺在其僉擬察

錄囚之過力為平反行踵召音聿脩故事某創員已贅  
贊畫不長技本無它敢籓籬而自隔事當從長惟影響  
之相隨

通臨安趙僉判

崇寔

李梅亭

天府元僚亦既入芙蓉之幕冰臺末屬何幸託桃李之  
場謂已納交遂忘執贄敢圖銜袖之禮適重斂衽之慙  
恭惟某官卓爾宗英濟之世美平氏之與韋氏僅聞閔  
閔之傳周公之謂魯公宜襲勲勞之舊俯試一同之治

迄騰三異之聲故國益有世臣藉未取苴茅之賞他人  
不如同姓自應聯棠棣之輝顧甘僉舍之勞來借神  
臯之潤雲飛川泳是為近咫尺之天海運風搏行即擊  
三千之水某濫塵吏底缺效恭先倒著白接羅所愧反  
躬之未稱報之青玉案更慙出吻之無奇

通曾僉判

穎秀

方壺山

西外諸生著小冠而趨邑南豐一辯瞻大幕以歸心亟  
拜短箋敢祈巨庇某官負才卓犖有文掄魁塗慶元之

朝衣獨無點污持嘉定之從橐惜不少留付清苦於諸  
郎已頡頏於一世積粟肥越泛蓮在汀郡大治難今也  
坐嘯山深俗獷轉如素馴孰通上下之情中有謨謀之  
彥留望此府名已滿羣公之間合薦於朝上亦記名臣  
之後某此生迂甚所至渺然一第為親猶恨養親之短  
三仕佐長豈堪為長於斯以未脫選之身治至難調之  
俗緩不及事急將病民幼誦聖言竊有慕於學愛公居  
幕府幸少寬其文書所為依皈莫究濡染

通鄭推官

志學

方壺山

錫燕瓊林共嚼紅綾之餅割雞杭邑獲依綠水之蓮恃  
此二同勇於一往某官文啓夕秀譽高旦評漢兩司農  
以來明經不墜閩四先生之後克世其傳移孝於官為  
儒而吏勾書聽訟局於有司入幕運謀無所不統有客  
如此與人誦之谷口輟耕既屑諸侯之聘尚書有履併  
還先世之聲某久相遊從出輒牢落聽聞已熟言之徒  
費於齒牙冒昧茲來甚矣自投於鼎鑊令之失權奚自

邑之治賦何先途人浪告以傳聞幕府稔諳於利病稍  
還舊觀密求振起之方全望大僚毋吝始終之庇情雖  
挾故分益壯牋

通劉司理

孫養晦

試三語之掾鳳高望府之稱調再轉之丞姑取循陔之  
便一封馳敬千里定交某官才必敏明量陂澄拓英靈  
穎脫光已射於斗斗翰墨天成力可排於風雨未促席  
前之對來司柱後之丈一念平反哀矜於所喜三章清

簡洗濯於不寃公既多治獄之寃天豈靳活人之報某  
却於操瑟來此對松寒鷗鷺之盟已大違於雅志程鳧  
驚之進豈無賴於忠規先此懇祈為之傾倒

與趙判官

劉後村

塞垣竊粟眇然天掾之卑幕府泛蓮仰止元僚之重既  
束裝而至境敢脩贄以及門某官文成一家書破萬卷  
昔慶歷之盛清獻見謂於名臣由建炎以來忠簡獨稱  
於賢相竄惟望族早決雋科宜冀北之掃空何周南之

留滯側聞當宁方急備邊屬者專城既精求於頗牧有如後乘宜首載於鄒枚諒婉婉以贊壽且颯颯而草檄少施餘智立策雋功賓主登臨何但勒豐碑於峴首神仙指點又將引歸路於蓬萊某涉世至迂承家不競菜羹陋巷粗安貧者之常丹竈草堂雅有終焉之志因出營於親金偶來踏於京塵既謀鄰境以需瓜甘學老人之種橘云何銷印莫追失馬之還及此拏舟幾有葬魚之厄親友贊休休之策上官移急急之符顧未暇於招



魂又豈諳於析律尚喜出庇臨之下庶親承教詔之餘  
雖無堂下之言可裨采擇設有幕中之辯竊冀優容

與張察推澄

劉後村

幕下東僚事權至重道傍試邑憂責匪輕屬當受察之  
初輒講通名之禮恭惟某官天才竒逸世緒清華覩王  
樹琅玕之標覺我形穢挹金莖沆瀣之氣使人意消以  
庾謝之風流加曹劉之才思夫何恬退尚此滯留蓋初  
潛之地素高故上介之選亦遴竊聞公子素馳魏闕之

心將有神仙共引蓬萊之路某功名事左耕釣趣淵攀  
龍附鳳而化侯王彼皆有命烹羊炰羔而作伏臘聊以  
忘憂昨忝封男蓋謀將母直謂煎熬已極採藥莫施不  
勝臨深履薄之危預起向若望洋之嘆惟公談笑係俗  
戚休雖縣譜未詳恐剗裁之不及然藩條具在苟遵守  
則有餘

與鮑知錄

並

劉後村

府僚體峻無若都曹縣令材難矧居孔道方席統臨之

此敢脩詞候之儀恭惟某官雋聲滿乎東南興學得於  
方寸吾觀華胄世出奇才溶以詩名家照之文入選至  
若府君之高致尤為前輩之美談不羸其身必在吾子  
惟其恬退尚爾滯留所謂馬曹難久稽於足下豈無狗  
監能力薦於上前某潦倒無堪清狂自喜運筆颯颯少  
從幕府之遊擊缶烏烏晚識田家之樂昨謀將母妄意  
封男豈知來繼於煎熬深恐上煩於督察先覺於後覺  
寧無警悟之言吾翁即迺翁倘念從遊之契

賀黃知錄

廉叟

方鳥山

君坐熱曹能令公喜我居冷席反教人為就托寅恭亟  
薰子墨恭惟某官雲天闊峻月旦評香無忝厥家肯屑  
為於祿仕尚論其世宜超取於美官少休警捕之勞來  
作紀綱之掾錄事言是太守至為改容參軍資高諸曹  
不敢平面然而位不踰德官未稱人樵水之陽豈能容  
於此客筭班之武行且亢於其宗糾郡佳哉通閭末矣  
某少空自喜壯竟無竒道不脩而文有名人皆疵汝技

虛富而家愈窘天實厭之偶不失於家璫詎敢當於教  
席方將取友何幸為僚譬草木之臭味同與其潔也維  
桑梓必恭敬止深有望焉忻慕方深談裁莫既

與楊司戶

士復

方烏山

首同前啓恭惟某官邦之耆哲士者宿師有子雲浮沈之思  
學根於識無盈川綺麗之作道澤其文亦既策一科之  
榮乃自試三語之掾得非深厭浮競輩所以寧為措大  
官然而經明行脩宜居館學意新齒宿宜謀廟朝公雖

不為利祿之圖時豈無任人物之責職稱品要姑匿薄  
念珠之廳上用老成即遨遊羣玉之府

尾同  
前啓

回田僉判

賀再  
任

戴象麓

三年脫手擬棹孤舟而賦歸去來再任從頭愧打五鼓  
而反推不去慶緘何腆謝語莫醕伏念某晚出書生素  
疎吏事幸依仁於鄭里粗逃責於虞箴下考三書自笑  
已窮於鼠技上恩再命豈堪復弄於牛刀勉強以視斯  
民終始誰為之地伏惟某官名門梧鳳仁里耆龜陳太

丘在鄉爭訟不願他決王彥方居里盜賊咸畏其知所  
發皆老成重厚之謀誠有補撫摩惠養之政喜去門牆  
之不遠當圖藥石之時親每事公心亦有意楚子文之  
無喜惟公終惠庶不孤漢延壽之見留染報雖勤願言  
莫既

回費僉判

李梅亭

易地借材詰朝入幕遷於喬木可見主人之相知陟彼  
高岡良勞君子之于役恭惟某官典刑勝士文獻故家

子弟欲其自佳不顯亦世公侯必復其始無競維人暫  
茲泛綠以依紅行矣紆青而拖紫某濫乘一障正窘百  
罹忻聞主畫之良將有蒙成之托集思廣益何幸承賢  
者之來同寅協恭所望有忠焉之誨

回汪兼僉

鄭雪巖

辰乎辰乎何來遲抗懷甚壯時哉時哉當其可有志竟  
成聊戕弁以假塗宜取青而拾芥某官儒冠事業官樣  
文章雖買臣之仕少淹然張儀之舌猶在非棄班筆直



將戶列封侯蓋伍噲徒預擬名階計籍攜歸趙璧奪得  
楚弓菊花開向重陽誰云較晚桃浪煖正三月決勝如  
期某識面雖新賞音若舊幕中若有此客已張吾軍沙  
堤上應台躔行先多士大開笑口實獲我心

回曹節推孝慶

鄭雪岩

張公榮進素定何待薦揚韓子謂已深知豈容辭遜聊  
借君重以為我榮伏惟某官學有淵源文窮根柢六館  
正色早知同流合汙之非決策兩科略無東塗西抹之

態有識推敬並遊厚顏力易搏風仕不擇地毫芒少試  
步武不凡某冒為此來宛如有約得議曹王生在幕吾  
復何憂有處士石洪為媒人方不棄平沙之雁已聚舊  
社之鷗可寒毋足增高適恐有玷丁丁伐木神其聽之  
和且平采采盈筐心乎好之喜不寐相期者遠適觀厥  
成

回魏察推

國華

鄭雪岩

信在言前鷗盟敢背春回臘裏鶚表竟飛君欠合共余

宜備數伏惟某官准人質直漢吏循良方今之立功名  
三邊為重吾子之負才氣一第可嘉任重之材當厚扶  
持致遠之器宜自愛護更堅所守當大其成某奉尺五  
符逢二三友幕中之辯有異席上之珍可遺約之歲寒  
予以露薦由之果求之藝從政夫何有哉惠之和夷之  
清立節有如此者相期之意有味斯言

回新趙判官

方秋崖

子及吾門恍廬山其昨夢君望此府尋秀水之勝遊樂

哉斯逢寧不予助伏惟某官祥麟質粹題雁名香愛蓮  
同者何人肯浣出朱而入墨思棠而況其子共欣泛綠  
以依紅何幸駒苑之奇來贊雌堂之老某甫宅乃牧辱  
貺以書清於玉壺冰會言近只贈我錦繡段何以報之  
論心匪遙埃面併謝

回車判官

王曜軒

秋菊有佳色何意為州春山多勝遊方幸從事無若羹  
蓴之夢已告熟瓜之期伏惟某官駕千秋而有聲囊數

螢而自照觀所到處不騷國則詩鄉翩其歸來繇辟雍  
而冊府獨念雌堂之老守失茲辯幕之奇人某生而草  
茅久矣荆棘大丈夫有芒角政坐此愚文章士妙語言  
願以為頌猶及半面共論此心

回楊推官

方秋崖

柳生吾肘何意乎人世間竹剖爾符所賴者賢從事曾  
識廬山之面幸同君子之寮伏惟某官清乎玉谿之英  
確然鐵硯之志依芙蓉幕畫諾甚高顓翰墨林騰踏非

晚會齊飛於五鳳將迅召於一變某生而草茅老矣荆  
棘別去十寒暑但嗟今我之衰聿來雙緘藤喜有故人  
之在使予坐笑時乃之休

回鄭推官

危巽齋

三刀為州幸戍期之涓吉一賢在幕喜王事之協恭尺  
書寫心千里對面伏惟某官璫璵偉望樞紐名家遊办  
發新硎畧無凝滯啖蔗入佳境寧復淹回聞贊畫之從  
容諒古今之練達佇騰薦剡徑上夷途某久矣知名於

焉聯事念痒疴之舉切悉已周知况脈絡之相關可忘  
忠告

回魏知錄必昌

劉後村

都曹贊畫固殊蠻府之參軍驛使傳書首訪漆園之傲  
吏肅容而讀舞手不知恭惟某官有是天才輔以學力  
昔大君子策勲翰墨之場以甲科郎標名忠義之傳丹  
桂之芳傳子羽林之典錄孤粵從妙齡已著華問至今  
岷江之俗猶言少府之清曷不登畿肯來糾郡阮生趨

府信知語掾之獨賢龔守還朝會與議曹而同拜某身  
投巖壑景薄崦嵫夫何幕下之名流尚記漳濱之病叟  
鏗鉤雅奏粉黛醜顏子寧不嗣音我老既難趨於賓謁  
余方有公事君忙未必喜於客來聊課蕪詞少酬藻思

回郭知錄

伯長

李梅亭

對北堂之馬耳自昔通家問南山之鳳雛乃今補掾貽  
書勤甚喚夢淒然恭惟某官詩禮磨礪典刑服叢飲冰  
食蘖不忘先訓之勤斂板折腰猶待糾曹之次三語之



機相契五章之剡何難某星且拱辰日將入酉伏波床  
下敢當盛意之勤渠子陵臺邊或恐歸舟之邂逅

回權知錄

方秋崖

久於家食豈御牧材孰與郡謀有紀綱掾竊自意雌堂  
之幸必毋忘鞠城之銘伏惟某官南渡故家東滙奇氣  
於今幾代尚餘質肅之風有友五人行著通明之籍天  
報之福世傳以忠某生而草茅老矣荆棘忽相從於春  
水同君子寮使毋至於秋荼則執事責行矣胥晤敢無

脩容

回黃司理

方秋崖

雌黃多暇無筆腦風狂獄皆春有墨曹在亦頗哀於老子勿盡諉於斯人伏惟某官楚東之英斗北之望惟刑其恤能盡心者吾儒乎非知之艱諒反手而仁民矣端飛五鳳何負一夔某生而草茅老矣荆棘忽相從於春水同君子寮使毋至於秋荼則執事責行矣胥晤敢無脩容

回司馬司理

方烏山

芹宮聊耳有慙方山子之風李掾佳哉況是涑水翁之  
裔亟薰子墨祇叙寅恭恭惟某官仕學兩優人門儷美  
昔元祐相方高夔伊傅而無慙繫司馬家何王謝崔盧  
之足道肖其風烈在此雲初文獻染濡之深典章閱習  
之久便合對殿陛而納甘棠之笏奈何眉州縣而製芙  
蓉之裳然而積多者報豐施遐者登驟盛德百世之祀  
豈欺我哉能活千人者封行將見矣佇由樵水徑上筍

班某寡與世偕甘居人下一行作吏嗟本志之已非獨  
欠為師撫平生而自笑詎圖寂寞獲接賢豪君子若人  
豈曰三尺法而已達者之後謹奉一瓣香以從依倚方  
新揆裁靡竟

回趙司法

方秋崖

昌黎坐處寧容祈下之病夫山谷詩中曾識袁州之司  
法惠而好我翩其有書某官宛為國珍所謂趙玉以三  
尺從事已薄矣政賴仁言得五章薦進其歸乎式遄班

引遡沿已久騫迅必高某生而草茅老矣荆棘忽相從  
於春水同君子寮使毋至於秋荼則執事責惟刑之恤  
時乃之休

回趙司戶

方秋崖

毛髮衰殘孰為民長生齒繁息是在版曹豈無仁人之  
言告以此邦之瘼伏惟某官詩書厚澤忠義故家當日  
四夷警澹菴之一疏至今幾代茂世閱於諸孫諒交公  
車之章遂著通閨之籍某少所諧可久於廢閒何意驚

猿忽相從於繡水聿來烹鯉思亟奉於緒言敢無脩容  
行矣胥晤

回李司戶

方秋崖

吾榜得人最盛喜並英遊淮南從事多賢雅聞精選公  
望久矣我心寫今恭惟某官世傳仙學之根家有甘棠  
之笏逐兔斲廣寒桂妙秋月以搞毫躍馬看長安花鄙  
春風之得意肯聽邊頭之鼓角小試胸中之甲兵蠹爾  
蠻荆為大邦讐是亦儒紳之恥越厥疆土肆于先王願

言民版之繁某平沈半生晚得一第鱣堂夜午甘同鄭  
老之襟期雁塞秋寒何補烏公之幕府歎毛錐子其安  
用尋遂初賦而欲歸適千里者喜見似人肯隔同年之  
面烹雙魚而中有尺素覲論疇昔之心

翰苑新書續集卷十八



欽定四庫全書

翰苑新書續集卷十九

教官類

賀台州高教授

陳寶牕

顯奉塗芝榮司采藻越王山上仰文星炳爛之光劉郎  
洞邊有教雨沈濃之潤雖閭茸未諧於鳳覩而掀昂已  
想於鳶飛敬以寸忱陳之尺牘某官精神灝噩咳唾春  
秋疇昔飛鳴在賈誼見稱之歲是何濡滯倍釋之不調

之年雖久屈而伸者斯道之常然以退為進者君子之學有孤風特操故能歲寒而柏後彫有隆寬大和故若水流而心不競迨險阻艱難之歷盡乃功名富貴之鼎來勿謂冷官猶勝俗吏矧此邦號學者之冀北而得師乃儒流之指南喚起惰偷挽回醇雅佩衿晨入青青亂和璵之雲燈火夜陳耿耿映棲棲之月斯文有立吾道自尊只虞促召於老成不使久安於恬適某已疲文織頗悟道耕鞭志螢牕甚欲尾前脩之故縱程鵬海則已

為餘子所先命壓頭其奈何笑視舌而徒在幸昔日黃  
堂之獎予乃累年絳帳之顧知拔之布韋畀以領袖雖  
公論尚蒙於見錄而私懷祇極於自憐幸有宗工為之  
真鏡韓魏公之知永叔或比以昌黎而無疑陳後山之  
德南豐雖更遇東坡而莫奪永言祈嚮不既編摩

上贛川黃教授

戴象麓

粉杜聯陰曾拜魯山之眉宇花封叨警復依闕里之肩  
牆喜將趨丈席之隅烏敢緩尺牋之敬恭惟某官士林

冠冕名聞珪璋胸中三光五嶽之渾全筆下千兵萬馬  
之馳騁冲和丰度籍甚山谷先生之清標典雅詞章宛  
然白石夫子之叢稿早遊校庠序之地優居俊選造之  
流謂宜濶步於蓬萊尚爾回翔於芹泮睠惟章貢之地  
素號文物之邦非鄭老之道出義皇曷居氍毹必董生  
之學探游夏始下經帷暫煩絳帳之臨以慰青衿之願  
巍然養望不妨賦簷花夜雨之詩展也逢時當即播階  
藥春風之詠某竹蒲素習桑梓晚生濫叨一第之微僅

慰雙親之望不恥折腰而作尉惟知俯首以事賢千里  
微蹤幸適鄭鄉之仁庇一分餘潤仰祈魯泮之恩波依  
嚮有餘揄揚不足

通交代王教授日新

方烏山

鱣集告祥少駐木天之軌鯉烹得信言脂樵水之車安  
能有式於大夫國人獨善受教於先生長者敬裁短訥  
往贄崇嚴恭惟某官義獻家風時郊世譜舉幡而閉空  
舍主士者之齊盟措笏而誦阿房為詞人之獨步意其

傑出必也怒飛曾謂廣寒之仙不嫌獨冷之職以采藻  
采芹之樂地寓刈萁刈楚之盛心閱歷眼高友其邦士  
之仁者作成意濶得夫英才而育之絃歌之最冠於甌  
閩衿佩之盛侔於鄒魯厥今上崇文治相用耆儒凡一時  
清望之官多六館知名之士况後學仰之如北斗宜諸  
公推之於青雲滴露研朱暫了燈牕之課凌青遡紫穗  
為渠觀之遊添成美談突過近比某少孤多難未老先  
衰方為舉子時通國吠宗元之雪及對大廷後夫人笑

劉蕢之風自合為收聲息影之圖乃輒居召開取謗之地姑祿仕耳如教法何念童年及從諸老遊而執事乃我丈人行何止踵芳規之遺後尚將徼大惠以居中冒然以前恃此無恐慕金莖之高趣奈驅於貧聞輔嗣之微言倘醫吾俗其為依嚮莫究揆哉

通興化許教授

文岳

方烏山

錫命楓宸橫經莆泮曾到廣寒之高處桂籍猶香不嫌獨冷而此來芹宮何幸文章增氣衿佩屬心恭惟某官

胸著千年眼空九有山川氣王是生殊尤傑特之人師  
友功深恥為揣摩迎合之學速化若淹於驥足奮飛行  
奪於龍頭人亦有言將放京官通判之例公則求志僅  
注方國博士以歸觀其不卑小官所以養成大器甫錦  
旋於行李俄檄報於縮瓜非天之欲相道歟是邦也信  
得師矣維莆介福泉之郡乃古稱鄒魯之鄉其如此年  
寢失舊觀羣數十士而飯爭怒若讐列十三齋以居荒  
涼如驛屈衣冠而儕廝隸之伍化弦誦而粘牆壁之文



學職祇以媚貴權月課反以便販鬻遂令佳士各懷鄙  
夷學校之心至使儒宮殆成斲喪人材之地嘆采藻之  
風安在視鞠蔬之世幾希雖輪奐之更新奈汙染之滋  
甚不圖海嶠暫屈天仙固嘗改絃易轍為之何特角詞  
習藝而已喻於利必使喻於義化其習莫若化其心使昌  
黎之笑無從而孝先之嘲不作相接仁義少生羶坐之  
光素定功名必驗鳳池之夢某謏材陋識單見淺聞學  
造小成非不閑家庭之訓年幾而立依然習場屋之文

何期沈利欲之波乃及識師儒之樣黃飯白袍亦識可  
恥縞衣綦巾豈不自娛融之徒有數百人豈敢儕於高  
第點之撰異二三子倘時聽於雅言狂簡詞窮皈依心  
切

代通興化陳教授

如晦

方烏山

恭審迂軌蓬山橫經莆泮人士數百輩久欽重席之聲  
才名三十年尚作無羶之客在先生可謂屈矣而斯文  
抑何幸耶不能借客卿以鳴胡取在弟子之列恭惟某

官士林威鳳學海老龍觀其不詭於聖人類是師友孔  
孟使之可行於天下定是妾婦儀秦粵從身躋膺仕以  
來不知世有速化之事後來舉子固多分竹以乘輶向  
日門生久已持荷而簪筆嗟諸公之袞袞任此士之冥  
冥特立獨行固其官之拓落難進易退然此道則光明  
雖陋邦介在福泉而多士號稱鄒魯孰羞吾黨頓失舊  
規盃飯齷肉之微爭如讐敵李課月程之際謗甚丘山  
庸庸者流滔滔皆是豈無佳士類有鄙夷學校之心遂

使文宮反為斲喪人材之地歎采藻之風安在視鞠蔬  
之世幾希不圖溺利欲之波乃及識師儒之樣是必講  
明經術而文風古整頓規矩而士習淳淵源醞藉足以  
儀型議論風旨可以淑艾使孝先之嘲不作而昌黎之  
笑無從居廣文館為人師何妨獨冷有羣玉山待公等  
即上太清某筆硯腐儒箕裘末裔勉勉小成之學徒有  
此心駸駸而立之年竟成何事幸逢哲匠得齒諸生豈  
敢較課試之得失而計廩稍之有無實喜觀道德於前

後而聽議論於左右黃飯白袍之留滯自亦恥之縞衣  
綦巾之逶迤可與進否其為狂簡不盡依歸

通李教授

以稱

方壺山

隨羣上苑偶同鴈序之登學製窮山幸廣鶚林之蔭儻  
扳援之肯許毋清濁之太分某官地占四明門聯三秀  
父如龍兄如虎伯吹埴仲吹簫舍選積優臚傳高唱斯  
皆造物之至靳多取世間之美名深夜辯經至徹聲於  
四外同時載道各分教於一方公所辱臨汀為稍僻其

質淳告以善道其體陋鼓之雄詞相望三州就最士風  
之懿行聚兩學不逃家論之公某本是北人生於西外  
逢場不勇宜墮冗流請邑無名自憐左計渾成俗吏慙  
見師儒令尹仁矣乎未敢子文之信前言戲之耳願求  
夫子之褒先班尺牋行趨丈席

通武岡陳教授震

李梅亭

造託湘流疑已就碧油之幙延緣巫水乃聞還絳帳之  
紗愧執訊之已稽盍通名而告至恭惟某官學探千載

文擅一家聲摩殿前曾三誦阿房之賦禮羅幙下顧載  
歌泮水之詩茲聞交章行即陞覲紫星好學正爾恢天  
網之收黃閣收賢會亟勸露門之講州縣徒勞人耳將相  
寧有種乎某垂老無聞甚愚不肖向者誨諸生於館下  
要是牛溲茲焉試別駕之治中亦非驥足不曰丞哉之  
余負亦惟善者之吾師倘諧半面之期亦勝交臂之失  
監州無繻恐非直杯水之官廣文有羶幸或作數句之  
客

通權教蔡僉判

方秋崖

挹芝眉於鶴府曾論師學之同揚木舌於鱸堂式借賓僚之重得君為代告我以情蓋將綢繆朋友之交其必脫畧世俗之外云胡不喜久已相知恭惟某官得中郎之異書搗君謨之妙墨嘗袖周官而獨徃豈惟識河汾王氏之傳欲起漢儒而與言當盡得洙泗聖門之蘊方其披琅玕以叫閭闔謂宜跨元圃而登崑崙奚為環滁山水之間肯尋歐陽文字之樂依芙蓉於儉幕漫穿從



事之衫采芹藻於魯宮每重博士之席於以見斯文之  
寄其或捨吾曹而誰適有璽函置之渠觀某粵從雨別  
坐想風期思昔老先生幾眼空於四海每評諸弟子僅  
齒及於數人顧惟見收於犇北之餘亦曾未快其圖南  
之適推一夔於別省雞失旦而始鳴儕八愷於甲科鴻  
遇風而猶却孰為幸會辱在交承有嘉益友之分深敢  
歎廣文之官冷山行六七里想未寒鷗鷺之鳴雲飛九  
萬程恐莫企鷗鵬之化願聞一語謹已三薰

回蔡教授

鄭雪巖

起家與郡方虞保障之難在泮得人却喜寅恭之共有  
來飛翰良佩高情伏惟某官以文發身有志行道平生  
問學將發揮事業之間到手功名却肯駐塵沙之地豪  
芒少試遠大可覘寧患荆舒之莫懲自見萊人之坐却  
一賢而制外侮夫復何憂千里而遇故人若為之喜某  
自量老鈍已分退閒方懷江東日暮之思忽共塞北風  
寒之護班荆而論時事方切於懷擊楫而清中原諒同

此志率爾具報莫既欲言

回方教授

方秋崖

得乎天子為諸侯胡然易播豈無他人我同姓幸甚識  
荆方抱遺經更容通譜恭惟眼空四海胸著千年佩明  
月冠切雲幼余好此奇服排閭風倚閭闔塞誰留今中  
洲豈其碧玉之環自可青藜之杖何詎焚硯差間讀書  
二三子以我為隱乎言觀芹泮九萬里則風在下矣徑  
上蓬壺某及爾為僚所願則學何與韓同姓為近而況

宗盟顏子禹易地皆然敢忘經訓

回程教授

方秋崖

某頑不可鑄愚而自用視人之溺真若同舟之遇風謂  
我何求寧知隣國之為壑遽見効於賈傅頗無負於廬  
君雖失一老兵得一老兵意廟堂不以為罪矣然違吾  
崔子又吾崔子舍田園亦將安歸乎有來賀言無數感  
著

回本軍吳教授

戴象麓

伏審疏榮芝檢典教芹宮學道愛人雖嘗佩聖門之教  
以經師吏今幸覩師匠之模帝遣公來天為僕設恭惟  
某官治聲第一經術少雙以心傳曾子之心所學得顏  
氏之學題千佛經而早馳雋軌作三語掾而蔚有休稱  
方種德以欽刑又助君而明教蓋張南浦之風猷如在  
而周濂溪之衣鉢尚存暫借文衡上續道脈小子皆有  
造樂依鑪錘之功先生自此升大作棟梁之用不待煖  
席佇見予環某朴矣無庸冒焉學製從事俎豆而困於

軍旅勞心保障而加之蠶絲嗟哉鼠技之已窮幸甚鱣堂之伊邇全資甄就庶獲璧全一卷之書必立師願安承教十室之邑使為宰或可圖終頌祝之私編摩罔既

回白教授

李梅亭

下車聞庠序之教亟欲引賢積閱限銓選之文甫能剡奏是亦公舉何費屬辭恭惟某官行無疵瑕學有源委繫堂下之馬安能鬱鬱以久居釣海上之鰲行即飄飄而高舉聊助鼓旗之譟何勤珠璧之投某愛莫助之顏

之厚矣引鼎不程其力聊復露章推轂有味其言更祈  
強學

回王教授

李梅亭

八公同辰推薦賢之轂一第涵子寒坐客之氈輒用名  
聞何勤私謝恭惟某官粉省佳士詞場雋人何蕃貌不  
任其心而名焯焯仲舒言有用於世其對洋洋鶚既集  
於泮林鳳當巢於阿閣平昌足矣况有李翱之言翁歸  
不私何害山陽之託吾徒得君重耳子亦來見我乎某過

辱臨存更勤責况扈甘泉之八十一乘殊愧所蒙登凌  
煙者二十四人更期自勉

回陳教授

危巽齋

一馬二童方謀趨郡雙魚尺素遽辱貽緘下問熒然高  
情厚甚伏惟某官虞庠雋選漢殿英游懷明月佩連城  
久翔文價朝天津夕西極合在周行顧迂芸閣之賢再  
職芹宮之教惟今閩粵之地若古洙泗之郊有來學校  
之英率是山川之秀詠歸沂水共推夫子之循循騰上



雲衢行繼諸公之衮衮某屏藩所寄政教是兼倘田里有愁嘆之聲敢忘已責使城闕無佻達之習則賴陶成

回泉州陳教授

真西山

泉山缺守猥及陳人類水有師夙稱名士所遭幸矣何喜如之某曩自乘輅來叨分竹僅守孔門節愛之訓曾微漢吏牧養之材二千石之分憂昔已慚於理效十六年而申命今復被於恩光當民生憔悴之餘與郡計殫殘之後必恢恢而餘地猶費支吾技斷斷以亡他若何

經理倘非賴僚友多門之益未易副聖明使過之求伏  
惟某官直諒之資通明之識必有講畫以助設施社稷  
人民正欲觀於為學文章政事勿自限於殊途

回沈教授

劉後村

牛駕出關久慕周柱史之去鱣堂開卷不知漢博士之  
來曾執贄之未遑辱顧廬之甚寵恭惟某官今之巨擘  
古之譽髦心鄙雕蟲之文世守感麟之筆仲尼既歿昭  
垂袞斧於策書介甫何為詆曰斷爛之朝報絕學傳東

周之耆哲微言接西洛之大儒誕啓孫枝相輝奕葉惟  
三傳束閣上之久深探遺經當諸生立館下之初願聞  
精論避席而請堵牆以觀必有以新啖陸訓詁之陳言  
掃舒弘科舉之陋習豈惟逢掖共尊明復之書將見細  
旃亦讀康侯之傳某少纔涉獵晚益情荒禁漏宮蓮往  
事類優場之散長鋤短笠暮年為老圃之歸屬逢開絳  
帳之時恨不在青衿之列朋遠來學時習良愜素心我  
不往子嗣音寧忘私淑

與卜京教

王曜軒

正坐橫經公方見士於芹泮低頭入幕僕來依人之蓮  
池宦游清濁之雖殊官期先後之不遠敬裁鯉素徃白  
鱣堂恭惟某官早以文鳴紛其內美胸次貯冰壺之瑤  
璧筆端垂金薤之琳琅學易通神三畫曾吞於天上著  
書擬聖六丁屢下於人間舍選芬芳科名茂業直上宜  
薇階之侍斜飛亦藜閣之遊惟神京學校之崇在天子  
辟雍之側天下攀鱗附翼之士多游其間年來凌青邈

紫之班皆由此選必得括匠以主斯文肘後良方不惟授諸生速化之術心中有印抑將續正學未墜之傳多士填然附之先生自此升矣夾袋之紀人物簡注方新臺閣之繼諸公經綸可展某辛苦一第間闕十年讀相牛之經分甘襪圓得鹿之夢誤綴簪裳平生耿耿者猶存與時落落乎難合初筮經行於湘水正欲娛親至今悵望於衡雲不堪回首京幕戍期之已迫書生宦譜之未開若何免司敗誅所恃有師儒在短才有限豈堪

飄風草檄之忙暇日游從共和細雨簷花之句

與潭州施教授

王臞軒

正坐橫經公方有味於芹泮低頭入幕僕來依人之蓮池與其諧雁鷺於簿書之塵孰若從魚鳶於名教之樂固知清濁不等所喜臭味則同某官早以文鳴紛其內美詞壇馳騁見稱一釣之連鰲舍選芬芳端是三年之走馬亦既振鐸於信水便合濶步於道山相君摻袂以願留執事掉頭而不佳復挈絳帳來幸青衿登鄴侯之

堂而訪遺書沈酣今古酌醽醁之酒而發孤唱彈壓山  
川風斤一運而成棄材丹砂九轉而蘇廢疾誰不願薦  
居然青剡之鼎來人亦有言貯以玉堂而後快如某者  
弱惟殖學貧亦賣文詞場曾被於百瘡僅收末效宦海  
方航於一第未識前津雖平生之書癖難醫恐從此為  
吏氛所蝕有師儒可以親炙庶么麼得所依歸想從容  
教戒之餘皆畫諾笑談之助書生習懶豈堪飄風草檄  
之忙暇日從遊共細雨簷花之句

與真州陳教授

劉後村

詰禁園扉愧浮沈於俗吏橫經泮水喜親炙於勝流行  
矣樞衣斐然通勢某官褫身肅括造理精微讀九丘八  
索之書學尤博古黜諸子百家之說意在尊經早頡頏  
多士之邦復遭值右文之世借使玉堂之小卻亦當金  
馬之斜飛曾謂冷官尚淹先達政惟俎豆乃軍旅之宜  
聞設有甲兵以仁義而可撓諒講明之不輟致鄙暴之  
自銷稍變鞠蔬復令采藻士有所式先生何恨於氍寒



道之將行夫子豈容於席煖某承家不競涉世至迂耕  
汾上之田可支饘粥遮長安之日誤棄釣竿妻孥當豐  
歲而啼飢士友問何官而觸熱預薰心於丹筆徒矯首  
於絳帷賦王粲之從軍雖無才思過子雲而問字幸有  
師資

翰苑新書續集卷十九